

Visoki predstavnik donio zakone koji se odnose na Javni RTV servis

Sinoć je visoki predstavnik, Wolfgang Petritsch, donio paket odluka kojima je utvrđen pravni osnov za rad triju javnih RTV kuća Javnog RTV sistema Bosne i Hercegovine. Ovi zakoni: Zakon o osnovama Javnog RTV servisa i o Javnom RTV servisu BiH, Zakon o Radio-televiziji Federacije i Zakon o Radio-televiziji Republike Srpske, predstavljaju važan korak u procesu restrukturiranja Javnog RTV sistema u Bosni i Hercegovini u skladu sa evropskim standardima na koje je Vijeće za provedbu mira apeliralo u nekoliko navrata. Nadalje, ovim se ispunjava i značajan uslov iz smjernica Evropske unije (Road Map).

Ovim zakonima je data značajnija uloga Regulatornoj agenciji za komunikacije u njenim odnosima sa javim RTV sistemom, i osiguran je pravičan balans između interesa javnih i komercijalnih emitera, što je od ključnog značaja za uspostavljanje pluralističkog RTV sektora u Bosni i Hercegovini.

Opredjeljenje Predsjedništva pokazano usvajanjem Memoranduma o razumjevanju o restrukturiranju RTVBIH u junu 1998. godine otvorilo je put za donošenje ovih odluka. Od tada je Visoki predstavnik donio dvije odluke o procesu restrukturiranja Javnog radio-televizijskog sistema u BiH kojima je podržan proces transformacije RTVBiH. Pravni okvir koji je juče nametnut predstavlja temeljni preduslov za omogućavanje efikasnog i finansijski održivog rada javnih RTV servisa.

Visoki predstavnik izražava svoju pohvalu radnim grupama koje su radile na sva tri zakona za njihov profesionalizam i predanost u procesu njihove izrade. Međutim zbog upornih protivljenja Republike Srpske postalo je jasno da politički

dogovor nije moguć. Stoga je Visoki predstavnik nametnuo ova tri zakona.

Dio ovog paketa je i Odluka o likvidaciji RTVBiH u skladu sa Drugom odlukom Visokog predstavnika o restrukturiranju Javnog RTV sistema u Bosni i Hercegovini. Ovu odluku je bilo potrebno donijeti zbog činjenice da ne postoji državni zakon koji regulira likvidaciju javnih preduzeća.